

Friday, October 3, 2025

Time - 2:30pm

CHIEF MINISTER

Chief Minister Pu Lalduhoma'n Thalaiten zirna an uar a tul thu sawiin ruihhlo laka fihlim bakah hmasawnna avanga thil inthlakthlengna dawnawn thiam a tul thu a sawi.

Pu Lalduhoma hian vawiin khan a bial Buangpui Community Hall-a Buangpui Branch YMA kum 50-na (Golden Jubilee) lawmna chu khuallian niin a hmanpui a, Buangpui mipuite lawmpuina hlanin YMA chu pawl zahawm leh thianghlim, mi zawng zawng lenna a ni tih a sawi.

Chief Minister chuan Thalaiten zirna an uar a tul thu sawiin ruihhlo laka fihlim hmasak a pawimawh a ti a, hmasawnna lo thleng zelin a ken tel inthlakthlengna lo dawnawn thiam a tul thu a sawi baw.

Pu Lalduhoma chuan YMA chu Mizo hnam huikhawmtu, kristianna pen bosan si lo va Zo nun ze mawi chhawm nungtu leh zirtirtu a ni a ti a, Thangtharte hnena zo nun ze mawi zirtirna leh kaihhruaina chu a kalpui tur a ni a, tlawmngaihna te, aia upa zahna te, tanpui ngaite tanpui chu chhawm nun zel a pawimawh tih sawiin hnam zia awn him leh tih hmasawn kawngah tha thlah loa tan mar a pawimawh thu a sawi.

Chief Minister chuan tunlai thiamna leh sum leh pai lamah hmasawn mahse thangtharte nun a tlakhhiat zel si chuan, Mizo hnam a zuihral mai ang tih a hlauhawm a ti a, mizo chin dan tha chhawm nun zel a pawimawh tih a sawi baw.

Buangpui YMA hi kum 1975-ah din a ni a, Tunah hian in 114 awmin mihring 518 an cheng mek a, an zinga mi 358 hi YMA member an ni.



NATIONAL WILDLIFE WEEK 2025

Nungchate humhalh hapta National Wildlife Week Vawi 71-na chu vawiin khan Mizoram hmun hrang hrangah hman a ni. Nungchate humhalh hapta hi Aizawlah chuan Assembly Annexe Conference Hall ah hman niin Environment, Forest & Climate Change Minister Pu Lalthansanga chuan khuallian niin a hmanpui a, Serchhipah chuan Brilliant Higher Secondary School New Serchhipah neih niin Thenzawl DFO Dr R.Lalnungrenga chuan - Mihring leh nungchate chu cheng ho tura khuanu duan an nih avangin intibuai lova chen ho an zir a ngai a ti a. Nungchate tihlum chu hrem theih a ni a, danah chuan an taksa peng leh an bu tihchhiat te pawh hrem theih vek a ni tih a sawi. Vawiina Serchhipa Wildlife week hawnnaah hian nungcha humhalh tul zia tihlanna lemziak intihsia lawmman sem a ni baw.



RASHTRIYA POSHAN MAAH

Nu leh naupang tana chaw tha inzirtirna, Poshan Maah chu Mizorama Anganwadi Centre hrang hrangah September thla chung khan hman a ni.

Poshan Maah chungchanga Akashvani Aizawl in a kawmnaah, Mizoram Women and Child Development Department Deputy Director Pi Sailopari chuan Poshan Maah chu sorkar laipua Ministry of Women and Child Development in a duan a ni tih sawiin, he programme in a tum ber chu naupang than thu, naupang an san zawng en a cher leh lutuk, naupang thang tha lo, leh thisen tlakhhamna tih tlem te a ni a ti. September thla chung khan, Pi Sailopari chuan Mizoram khaw hrang hranga Anganwadi Centre-ah naupang kum 3 atanga kum 6 inkarte hnena inzirtirna tur, thiam

bul tanna bu siam a ni a, eitur leh damdawi tha te an sem bawk thin tih sawiin, nu pum chhung a naute a insiam atanga kum 2 a nih thleng chu mihring huna hun pawimawh ber a ni a, hemi hunlai hian nu pawhin iron leh calcium tiamin damdawi leh eitur tha a ei a pawimawh hle a, naute a lo piana thla 6 a nih thlengin nu hnute tui chauh hmanga chawm chu a tawk a ti a, thla 6 a tlin hnu atangin chaw pangngai thei leh thlai her dip eitur a tha hle tih a sawi.



SIAHA ALL NGO

Siaha All NGO chu vawiin khan District Hospital Siaha-a Senior Chief Medical Officer Dr Lalnunziri sawn an duhlohna lantirin an pungkawm.

Punkhawmna ah hian All NGOs chuan Sr CMO an sawnna order sawrkarin a siam tawh chu sut leh tur in an ti a, district hlun taka an senior doctor min sawn sak a, Junior doctor in Medical lama office lian ber pawl a luah tur chu an duhlo takzet a ti a, Siaha Joint NGO chuan September ni 29 khan Health Minister hnen a order chu sut leh tur a ngenna an lo thehlut tawh tih a sawi bawk.

Vawiin hi incharge inhlan hun tur niin, Sr CMO pisa kai tur pawh Joint NGO ngenna in a pisa atang in a let leh a ni. Dr Lalnunziri hi Doctor hna a zawm atangin Siaha District ah bak hmundangah post ala nilo a ni.



SPECIAL GRAM SABHA

Ministry of Tribal Affairs hnuaia Aadi Karmayogi Abhiyan chu kalpui mek niin tribal khua chawikanna tur leh hmasawanna hmathlir siam nan, Serchhip District chhunga Keitum chu Pilot Village-ah thlan niin vantlang inkhawm, Special Gram Sabha koh a ni a, khaw chhung hmasawanna atana ruahmanna hrang hrang rel ho a ni.

He hun hi Pi Neeva Boro, Senior Assistant at the National Scheduled Tribes Finance and Development Corporation (NSTFDC), MoTA aiawh in a hmanpui a. He hunah hian khaw hmasawanna atana thawh dan tur Village Action Plan chu pharh niin mipui te nen sawiho a nih hnuah pawm a ni a. Khawtlang mipui 80 aia tam an tel a ni.

Aadi Karmayogi Abhiyan hnuaia thlan chhuah khaw hrang hranga hmalakna tur ruahmanpui tur hian Serchhip leh East Lungdar Block atan Block Master Trainer (BMT) 12 ruat niin, District Process Lab-ah training pek an ni tawh a. BMT-te kaihhruaina hian khaw tinin vantlang rorelnaah an khuaa hmalakna tur "Village Action Plan" an duang ang a, sawrkar ruahmanna (scheme) hrang hrang kaltlanga hmasawanna hna thawh chu he "Village Action Plan" mil hian kalpui a ni ang. Serchhip District ah khaw 23 an tel a ni.

RUSSIAN PRESIDENT

Russian President Vladimir Putin chuan December thla hian India a rawn tlawh tur thu Kremlin thupuangtu Dmitry Peskov chuan a sawi. Russia President Vladimir Putin an December thlaa India a rawn tlawh turah hian inbuatsaihna pawh uluk takin kalpui chhoh mek a ni a. Kum 2022 Ukraine buaina a chhuah hnua Russia President in India a tlawh leh hmasak ber tur a ni ang.

